

Rajković odlazi iz Jedinstva: "Tuzla mi je kao druga kuća"

Porukom nam se javila Ivana Rajković, golmanica RK Jedinstvo.

– Napuštam Tuzlu, drago mi je što sam vas upoznala i hvala vam na saradnji – rekla je.

Ivana koja je, s prekidima, dres "labudica" nosila dvije sezone, jedno vrijeme branila je za RK Ilidžu, odakle se prošle sezone vratila u Tuzlu, nakon povrede Martine Šumelj.

Rajković je rođena u Zaječaru, a nastupala je, osim Jedinstva i Ilidže, za Boljevac, Proleter (Zrenjanin) i Crveni Krst iz Niša.

U Tuzli je radom, druženjem i neposrednošću osvojila simpatije brojnih rukometnih fanova, ali i ne samo njih.

– I meni je mnogo žao što odlazim, Tuzla i ljudi u Tuzli su mi prirasli za srce jako. Tuzla mi je kao druga kuća i tako sam se i osećala tu... – rekla je za naš portal.

Karijeru će nastaviti u drugom klubu, također u inostranstvu.

– Razlog mog odlaska je ponuda iz Slovenije. Idem u igrati u gradu Litija koji je u blizini Ljubljane. Klub igra Prvu ligu i potreban im je golman – objasnila je.

Poželjeli smo joj puno uspjeha i sreće u novoj sredini.

– Hvala vam puno! I ja vama želim sve najbolje, pa se vidimo uskoro u Tuzli, doći ću da vas posetim i vidim sve svoje prijatelje – zaključila je Ivana Rajković. (mp – Foto: Miroslav Petrović)

Date: 30-07-2019